

愚

齋

存

稿

又

又

寄直督裕壽帥

裕壽帥來電

李中堂來電

寄李中堂

寄張香帥

寄江督劉峴帥

寄粵督李中堂汕頭沈道台

寄李中堂

張香帥來電

寄張香帥

寄劉峴帥

寄李中堂

又

寄劉峴帥

寄李中堂

李中堂來電

寄總署許大臣

寄總署榮中堂直督裕壽帥蘆台聶功亭軍門

總署來電

寄總署許大臣

寄李中堂

總署許大臣來電

榮中堂來電

寄王中堂

寄劉峴帥

寄榮中堂

榮中堂來電

寄榮中堂

張香帥致總署榮中堂裕制台電

寄直督裕制軍蘆台聶軍門

寄北京榮中堂王中堂天津裕制軍

寄北京總署榮中堂天津裕督帥聶軍門

寄裕壽帥

榮中堂來電

寄北京總署榮中堂天津裕制軍聶軍門

榮中堂來電

寄北京榮中堂

寄王中堂

榮中堂來電

楊村聶軍門來電

寄李中堂

粵督李中堂來電

寄天津裕制台黃道台張道台保定廷藩台廷臬台孫
道台

寄北京欽差大臣榮中堂路礦總局王中堂

寄李中堂

寄劉峴帥張香帥

東撫袁慰帥來電

豐齋存稿

卷三十五目錄

加

思補樓藏版

劉峴帥來電

張香帥來電

寄江督劉峴帥鄂督張香帥

寄江督劉峴帥鄂督張香帥皖撫王灼帥粵督李中堂
蘇撫鹿滋帥東撫袁慰帥

張香帥來電

劉峴帥來電

袁慰帥來電

寄江鄂兩帥

寄劉峴帥

寄江甯劉峴帥蘇州鹿滋帥安慶王灼帥武昌張香帥
于次帥廣州李中堂長沙俞廩帥成都奎樂帥南昌松
鶴帥福州許筠帥

張香帥來電

寄李中堂

寄劉峴帥

劉峴帥來電

又

寄天津榮中堂

劉峴帥致榮中堂電

李中堂來電

寄廣州李中堂江甯劉制台蘇州鹿中丞安慶王中丞
武昌張制台成都奎制台濟南袁中丞福州許制台長
沙俞中丞

張香帥來電

劉峴帥來電

袁慰帥來電

李中堂來電

寄劉峴帥

江督劉峴帥來電

寄李中堂

李中堂來電

又

劉峴帥來電

寄李中堂

寄東撫袁中丞

袁中丞來電

又

寄李中堂

愚齋存彙卷第三十五

電報十二

寄粵督李傅相

光緒二十六年正月初二日

叩賀中堂夫子新禧建儲後甚安靜滬電局經元善聯
名電署干涉朝局交南洋嚴查治罪並電滬道看管乃
經守家屬二十七報瘋病回籍就醫聞於除夕搭法公
司船赴港並侵挪電局鉅款恐係畏罪遁逃乞派員赴
港誘獲押送赴滬並求鈞復

李傅相來電

正月初三日

港係洋界無從誘獲康已乘日本美洲丸二十七

日東去未定所向大約與梁同赴舊金山經卽附
入亦不爲害惟電局巨款如何侵挪自應根究懲

辦

寄署江督鹿芝帥

正月十二日

昨奉 密旨查拏經元善此人膽大妄爲實堪痛恨歲
杪據滬電局轉稟伊家屬稟報經患瘋病回籍就醫宣
卽請總署電滬道看管旋據局員電稱已搭法公司船
赴港並挪公款三萬七千餘元宣卽電請李中堂派員
誘獲押送赴滬當接回電以港屬洋界無從誘獲等語
業又電飭沿海各電局購查一有蹤迹卽知會地方官

拏辦但恐藏匿香港求之愈急匿之愈深似宜設法誘
離洋界方能弋獲刻已先行奏覆請 旨革職查抄矣
謹密陳

李傅相來電

正月二十一日

聞經元善逃匿澳門如意客棧內已派粵紳劉學
詢盧華紹齋給澳督公文請其拘禁交劉盧等押
解來省訊追如有 旨令尊處拏解俟罪人斯得
再電聞似無庸由電局具控侵挪康黨護經甚力
希速電復

寄李傅相

正月二十二日

蒙派劉盧赴澳拘解深爲感慰經元善臘二十六聯名
寓滬紳民電總署云奉二十四電 旨人心沸騰探聞
各國有調兵干預之說求王大臣公忠體國奏請 皇
上力疾臨御勿存退位之思上慰 太后憂勞下弭
中外反側等語總署函屬南洋嚴參治罪並無 廷寄
聞政府以立儲喜慶不欲殺人似係充發牌子數日閒
洋電之外尙有湖南聯名公電亦未發動宣因經係電
員卽請署電滬道看管經家屬先報病回籍嗣聞赴港
卽電鈞處 廷意初不甚重因余誠格奏參電員聚眾
妄爲危詞挾制請 嚴旨勒交以伸國憲卽奉 寄諭

有責成宣懷認真設法購拏毋任遠颺致干重咎之語
已覆奏將該員革職查抄一面嚴密購拏昨詢鄭道據
聞往來港澳蹤迹甚符合港澳非藉鼎力何能拘獲如
罪人斯得先求電示以便與榮相商酌辦法電稟定擬
寄東撫袁慰帥 正月二十三日

德總工程師錫樂巴已赴省商辦路事錫曾在香帥及
弟處數年於中國人情世故頗熟悉望公與開誠商酌
諒能妥貼鄙見必須遴選一練達時務大員隨工照料
方可省事

李傅相來電 正月二十六日

前派劉道等往澳卽照會澳督云經元善騙拐電局公款逃匿請拏交未便提伊電奏干涉國政恐不肯交二十六澳督電本日三鐘劉道台帶來公文謹悉五鐘已將經元善拏獲請飭送憑據以便遞解云所要憑據望將經騙去公款若干何人憑證指明立等照覆

寄李傅相

正月二十七日

十二月二十九據上海總局提調楊廷果總管周萬鵬電稟經元善離局後卽赴滬局查明經元善短解電報公款三萬七千餘元並未交代實有憑證請卽拏獲遞

解到粵乞中堂訊供核辦

又 正月二十七日

頃奉電復短解公款於騙拐字義尙覺稍欠查經元善家屬二十七具稟經患病回籍就醫二十九潛搭法公司船赴港查出虧挪鉅款實屬情同騙拐應請拏解到粵先乞訊供電示

又 正月二十八日

昨王芍帥向榮相言經係善人辦電局亦無過聾聵廢人無能爲患又有人函稱公電係日報館主筆因欲免出報費乃首列其名經係聾瘋受人之愚等語現已革

職查抄如照原議請充發與澳督公文騙拐之罪相當
若到案後另科重罪澳督執有騙拐憑據未免失信以
後若向港澳拏人恐不復靈頃商總署竹簣諸公屬卽
密達鈞處擬請到案後先電宣懷俟與榮相面商再請
鈞處訊供電奏

又二月初一日

據上海總局提調楊廷果等電稟經元善家屬臘月二
十七具稟元善因瘋回籍就醫乃二十九潛搭法公司
船赴港逃後查出侵挪公款甚鉅實屬情同誑騙查經
元善辦理國家電報滬局先後數十年向以爲誠實可

靠所有各分局彙解公款均屬經元善一人專司出入不意託詞潛逃昧良若此應請拏辦到粵先乞訊供電示

又二月初三日

頃滬局電稱經家屬請哈華託聞經在澳已認欠公款三萬八千餘元謂官已封其產值二萬七千元餘欠可繳清云唐少川由粵到謂港澳新聞報均傳中堂奉

密旨到粵卽就地正法等詞滬亦如此紛傳恐赴英葡兩領處徒生枝節等語劉所慮中肯卽電滬員與葡律師商辦但欠數我雖不提彼律師領事必持相抵大約

洋官總不願重辦請卽令劉告澳督照公文必不辦重
辟或可交解

李傅相來電 二月初四日

昨劉道與澳督商由滬道與葡領事查明經虧欠
潛逃情形卽可解交經不重辦劉已密告澳督矣
又二月初七日

頃接澳督文稱請移盛大臣將經元善侵挪經手
公款之案在上海查訊仍由駐滬西洋領事或領
事所派之員解審俟上海立案訊明後將案卷送
澳再由澳官復加查核如該員實犯有被控之罪

卽將該員交解向來交解罪犯辦法及和約所載
均須以憑證爲據等語聞經黨已請英律師哈華
託似須在滬會審前請勿提欠數因經自稱除封
家產作抵外餘欠旁人欲代繳清則本案經可無
罪未必交解若云奉 旨拏辦又恐牽及國政不
肯交矣除電滬道酌辦外希妥酌飭辦

寄李中堂

二月初九日

姑與滬道電商但洋報皆稱實爲國政恐難交解幸未
奏報如奉催緝再將現辦情形上陳如不問擬不提

寄南昌松中丞張方伯

二月十六日

顧令家相前蒙允留萍鄉所辦路礦買地等事紳民賴以翕服甚爲忻慰今聞該令俸滿自請引見如蒙俯准暫留俟路工告竣再令離萍於地方工程兼有裨益實深感叩

鄂督張香帥來電

二月二十日

鐵廠呈閱尊電具悉現鐵廠與鐵局酌擬結稿其文曰實結得光緒二十二年四月十一日漢陽鋼鐵廠改歸商等招股接辦所有機器物料及各處廠屋一律接收清楚冊報鐵政總局詳報在案並議定每鍊出生鐵一噸捐繳銀一兩擬俟尋獲佳

煤礦後共設煉鐵六爐每年可出鐵約十餘萬噸
卽每年可繳官款約十餘萬兩蒙湖廣督部堂張
奏咨亦在案並非不論出鐵多少每年認繳十萬
計自商等接辦之日起至二十五年年底止共只
煉出生鐵八萬四百七十一噸六百二十啟羅俱
有冊報可稽已照預提官本百萬之奏案遵先繳
銀五十餘萬兩隨時繳還從前官辦鐵廠所欠華
洋各商緊要各款並劃扣槍礮廠所用鐵廠鋼鐵
價值並無餘存是預繳銀數已溢出鐵噸數多至
數十倍至現在出鐵噸數所以不能遽多之故實

因採購焦炭道遠價昂僅開漢陽廠一爐復兼爐座時常出險停日加修致出鐵未能暢旺須俟萍鄉煤礦洋墜告成運道通達能以六爐齊開出鐵噸數加增捐數自可照案按噸多交商等亦不致久受虧累等語是否妥協請酌定示復

寄張香帥 一月二十六日

結稿似甚周匝已照預提官本百萬奏案下加在於預付軌價內先繳銀五十餘萬兩字樣俟萍鄉煤礦洋墜告成運道通達下加資本籌足力能添造以六爐齊開出鐵噸數加增字樣變相閱過卽辦咨呈並令局董繕

結附入呈送

又 二月二十七日

中國鋼鐵銷路甚狹六爐出鐵恐無銷路結語運送通達之下擬添資本籌足銷路暢旺二句以免後來詰責

又 三月十一日

鐵廠需用興國錳鐵甚急已電飭伍令璜前往開辦卽乞札飭興國州認真照料爲禱

寄直督裕壽帥 三月十三日

昨因比工程司稟請緝拏鐵路竊盜函懇一切諒蒙俯察頃又據稟日來義和黨於盧保一帶將有蠢動之勢

前數日曾有匿名揭帖定二十日舉事等情想此重大情形定當稟明政府已請比使向貴國政府請實力保護洋員等語洋人多疑已行孫道夏守留意防察查盧保正定一帶洋匠甚多乞嚴飭文武防護或請暫派馬勇二十名交孫道夏守以資梭巡鎮壓候鈞裁

裕壽帥來電

三月十四日

昨接來函已飭文武防護近日義和拳會蔓延各處均已分派營隊分路彈壓巡緝盧保正定一帶係隸中協正定鎮管轄茲承電示當再飭中協正定鎮多派弁兵均於現辦鐵路工程地方實力彈

壓梭巡以資保護

李中堂來電 三月二十四日

此間已設商局據司道議有本省巨商認築河隄
官督商辦可爲永遠之利張道來應令會商妥辦
總於設軌立棧無礙路局未便侵地方之權也

寄李中堂 三月二十五日

但求設軌立棧勿受挾制已電催張道到粵會商

寄張香帥 四月初五日

奉東電備蒙關切轉諭商人必深感激日來在淀園卽
與仁和熟商總以一咨了事爲妥公顧商廠商廠亦須

顧公故甯遲無錯所議洋貨稅釐併徵一事日內 廷
寄到鄂恐面稟太遲卽當詳細函達事關鉅款乞少待
函到再議擬望前出京

寄江督劉峴帥 四月初九日

赫德節略併徵復洋貨稅立可年得三千萬且年增一
年現還洋債七處釐金五百萬卽可騰出歸各省毋庸
稅司代徵等語目前要著必須各省查明以前洋貨釐
金實收若干以後須在併徵項下撥補若干便可釋疑
千鈞挽軸宜注重於此飭司局查覆實數庶可一語破
的望前與仲芳同行榮相腳病又請假

寄粵督李中堂汕頭沈道台

四月十二日

奉中堂文電汕地醫館屢求始允不致再有擴充頃據汕頭商局稟道委曹倅將局界南碼頭地又劃寬二十五丈長至北馬路插界給德商元興不但新拓碼頭不全且舊築碼頭亦有礙乞速電請中堂挽回以符定案保全碼頭云督憲已批定給商局之地豈能復爲洋商所奪且於舊築碼頭亦有礙中外定章無此辦法如領事嘗試務請堅拒以保華案而免貽笑外人

寄李中堂

四月十二日

周萬鵬電經供十款大約以潛逃爲諫廢立封產卽難

追欠澳督袒經斷不交解現商政府上已不提可暫聽之初次鈞電洋界難獲彼何能爲竟是定論加稅已交各省查復宣日內出京另有詳稟

張香帥來電

四月十二日

廷寄飭議洋貨加稅免釐事已於前五日奉到限一月內覆奏恐不能久待尊意有何良策速電示

寄張香帥

四月十四日

初七詳函計日可到昨請訓奉面諭此舉關係大局不能中止已發電催覆候旨卽來京開議戶部前因御史所奏恐土貨混充并貨赫德云仍給分運單過

卡稽而不征可防此弊閩樞部擬以各省電奏向收洋
貨釐金若干應撥補若干比較盈絀據赫德細算歲可
盈千數百萬洋債應由關代徵釐捐五百萬可先還各
省盧漢亦可十年贖回公匡時遠略諒具同心在鄂言
鄂似當奏明併徵後每年由關撥補若干庶期兼顧承
下詢備鈞裁

寄劉峴帥

四月十四日

鈔函謹悉初九上緘到否昨請訓 聖意甚決傳述大
帥面奏各語喜形於色樞部擬以各省覆奏向收洋貨
釐預備撥補數目比較盈絀 上頗慮逾限故欲先行

電奏並 面諭宣等候 旨卽速來京十五回滬

寄李中堂

四月十四日

二十六交查洋貨併徵十一電 旨及譯戶公電想已
到昨召對 聖意決計要辦赫德照值百抽十五算洋
貨可收三千萬除照上年撥抵正稅七百萬沿途半稅
及釐金三百五十萬落地釐一百五十萬減茶稅二百
萬共約一千五百萬可盈一半兩江山東竭力請辦師
創此議諒可透切玉成頃已另具詳函以備核奏目前
先電奏粵省向收洋貨釐捐若干以後應撥補若干乃
可比較定見宣等奏准回南考察商務明日出京

又 四月二十五日

加稅函件諒蒙鈞覽南北洋均主併徵即可覆奏師全
局在胸諒必主持原議不爲司局所搖乞速電示大旨
宣明日抵鄂如鈞處與南北洋均歸一轍當力請南皮
勿生異議共扶大局

寄劉峴帥 四月二十九日

昨抵鄂香帥亦主併徵卽擬奏覆並謂國勢日難若不
趁早定議將來洋貨釐捐恐辦不動所慮值百抽十五
各國不允斷無自行疑沮之理云鈞處何日奏覆

寄李中堂 四月二十九日

叩賀卽真大喜昨繞江甯到鄂香帥亦主併徵剋日覆
奏樞見本以南北洋兩廣兩湖四處所議爲權衡峴帥
壽帥香帥均已晤商一律議准但求師座切實覆陳庶
足破浮議而慰 慈廬請訓之日面奉 懿旨只候
四督奏到卽有電 旨飭令進京已照會英使九月以
前開議英議院亦已議定准在北京開議師意如何乞
電示

李中堂來電 五月初一日

鄙意洋貨並徵或稍增餉惟此閒正議包釐中丞
及司局均執不可實慮商情渙散容定議再奉聞

寄總署許大臣

五月初二日

頃電奏如何匪能否速解散若遲恐慮保全燬豐台無恙否

寄總署榮中堂直督裕壽帥蘆台聶功亭軍門

五月初二日

頃接津電長辛店逃回工頭面稱洋人均在長辛店山上自守不得出圍等語請就近速派馬步隊進長辛店解圍將洋人二十餘名救出遲恐糧械皆絕如有傷亡彼等籍隸數國誠恐難於結束乞速施行

總署來電

五月初二日

榮相函稱前已飭聶軍門派撥馬步隊五營馳往

保定一帶查拏滋事倡匪茲據來電卽飛電聶軍
門竭力保護以免各國生心昨又派出武衛軍駐
紮盧溝橋豐台一帶彈壓此聞

寄總署許大臣

五月初二日

廬保洋人二十餘名尙在長辛店山上自守恐被戕擄
成巨案兩次電奏並請發兵速救洋人化大爲小未知
有兵進店否武衛現派何軍匪眾蜂聚何處豐台想必
無恙

寄李中堂

五月初二日

立豫甫云南北洋復電均到均言宜卽舉辦南洋尤切

實 慈聖意在必成不久卽有電催赴京開議等語
師意併徵可增餉包釐應在併徵內撥補於商無損拳
匪戕楊福同後拆毀盧保鐵路及半法比洋人二十餘
名尙未出險皆毓撫釀成也

總署許大臣來電

五月初三日

昨晚由署電飭北洋統領徐得標立刻撥隊往三
河莊保護頃悉各洋人均已到京可釋懸念豐台
車站機廠皆被燬匪眾現已四散津京照常開車
榮中堂來電

五月初三日

已派撥營隊馳赴盧溝橋長辛店一帶相機辦理

矣

寄王中堂

五月初三日

定興站又被焚匪向南行請速派營分札高牌店至定州尙可保全一半保省薇柏不和似須調處

寄劉峴帥

五月初三日

楊福同被戕後拳匪二十九初一將涿州至盧溝橋豐台鐵路車站機廠全行焚燬現尙忽散忽聚官軍不能進勦不特數百萬鉅款難籌修復恐養癰成患各國生心何堪設想大約朝廷姑息成見未解頃密電高密力陳利害恐人微言輕海內惟公抱忠赤可否再電高

密立定宗旨聚眾作亂者照律必誅以杜大患或請公
與香帥聯銜電奏

寄榮中堂 五月初三日

高牌店至定州鐵路及保定料廠亟求嚴飭聶軍責成
保護盧溝橋迤南請催肅清以杜外人藉口拳匪豈足
抵敵外患昨使館只派洋人八名持槍入圍卽將被困
洋人救出借款造路本係訂明由我保護與俄路不同
此次高牌店官軍袖視不救恐後有煩言至拆教堂燬
鐵路仍是 國家喫虧尤恐各國藉端派兵自衛況禦
外侮在練兵不在姑息匪類楊福同已被戕似難不以

匪論宣懷斷非因鐵路請洩憤實慮養癰成患各國生
心大局何堪設想務乞中堂詳察奏明辦理 宗社之
幸

榮中堂來電

五月初四日

盧溝橋可無患刻已電保定副將張士翰先爲保
護城外料廠並電北洋聶軍門責成認真速派數
營由高牌店保定至定州等處分段保護矣今晚
已有洋兵進城保護使館

寄榮中堂

五月初四日

頃保定藩臬來電邢統領派馬隊一營近紮料廠兼顧

附近鐵路惟地較長尙慮難周等語想土匪乘隙而發
不必整軍扼守只須於橋站處分紮首尾互應遇賊卽
擊今欲消弭外衅必須趕緊肅清 畿輔嚴禁團會是
在中堂獨運樞機勿惑迂論干冒尊嚴不勝惶悚

張香帥致總署榮中堂裕制台電

五月初四日

疊接北路電拳匪因鬧教滋事勢甚猖獗定興至
盧溝鐵路機廠車輛料廠盡毀實堪駭異迤南保
正鐵路以及保定料廠均屬可危如進兵稍遲必
致全路俱毀糜款數百萬如何修復目前自以保
全南路爲急務聞聶軍已進長新店該匪必四散

南竄沿途鐵路擬請速調聶軍數營直抵定興扼其南竄之路並在沿鐵路之處擇要駐守如有亂民肆擾卽行勦辦此等匪徒抗拒官兵戕殺武職大員擾近都門毀壞國家所設鐵路法所當誅大軍所至多貼告示聲明其罪曉諭良民勿爲所惑解散脅從其無知附和者自然渙散至於動手拆路焚房之徒按律亦當格殺勿論應准官軍開槍轟擊此乃藉鬧教而作亂專爲國家挑衅且鐵路與教堂何涉可見實係會匪斷非良民若滋鬧不已恐豫東義和團匪徒聞風響應勦撫均難且

各國必以保護教士教民爲詞派兵自辦大局將難收拾況近畿之地亂匪橫行尤於國威有損於交涉他事關礙甚多再洋人於鐵路經過之地皆欲自募兵保護蓄謀甚深漢口至信陽一帶洋人屢欲自行募兵護路洞極力阻止現專派勇一營保護鐵路渠始無說然心終不願若直隸官兵不能保路則湖北鐵路洋人必再申前說自行募兵無詞以拒之矣將來自漢至盧沿路皆設洋兵中原尙可問耶洞爲大局起見難安緘默故敢抒其管見不僅爲盧漢鐵路也尙祈鑒原俯賜裁酌之

寄直督裕制軍蘆台聶軍門 五月初四日

定興及方順橋道站均燬是保定南北鐵道均不能保
修復更難彈壓拳匪護守鐵路須擇有橋站處扼紮求
速電由保省飛飭駐防保定涑水涑州各營分頭防守
總須迎頭擊殺方免四竄是否乞鈞裁

寄北京榮中堂王中堂天津裕制軍 五月初四日

聶軍有馬步五營在保定涑水涑州等處沿鐵路分駐
乃定興及方順橋站道橋梁均又被燬保定南北似皆
無人扼守比公司語甚著急想此事非有統帥親臨調
度恐難得力可否請速派聶軍門暫往一行否則數百

里近京鐵路全燬國威殊損不特修復籌款之難急切
廣陳求恕干冒

寄北京總署榮中堂天津裕督帥聶軍門 五月初五日

孫鍾祥稟楊福同石亭村被戕距高牌店五十里匪因
火車調兵迅速自高牌拆起五日焚燬百數十里拳匪
隨處皆有路工綿長只有邢統領撥兩哨防護暗點只
有十八名張協三營早已分紮只有馬隊二百名守護
省城實難勻撥商藩臬亦無法等語乞速添調以顧保
正留一里是一里

寄裕壽帥 五月初五日

保定不添兵保正路亦必全燬電亦將阻已飭孫道自募二百名求電飭保定營務處速借洋槍二百桿連子藥稍資補救

榮中堂來電

五月初五日

涞涿一帶雖有練軍苦無統屬昨已電聶軍門令其親來並電保定中軍副將張士翰令其就近先顧料廠茲據電復已派隊官陸崑帶勇隊往來梭巡並電知邢長春將馬隊分紮專護鐵路橋站處所總之此等亂民若不卽時勦辦恐後難收拾實不敢惑於清議也

寄北京總署榮中堂天津裕制軍聶軍門

五月初五日

孫鍾祥初四夜電稱現長辛店涿州等處其聚拳匪一萬餘人匪黨徧處皆有勢甚危急涿匪將聶軍馬隊擒去十餘人並將州城踞住今早安肅南橋站道又焚燬現僅邢長春一營無濟各軍均袖視恐釀大變云保定重地似須添撥數營不僅鐵路數百萬鉅款可惜

榮中堂來電

五月初六日

盧保鐵路迭據直督聶提電知已派隊節節保護敝處已飭孫提督萬林近紫長辛店一帶相機進剿並請飭聶提星夜馳赴保定居中調度加意保

護總之欲消外衅必須趕緊肅清 畿輔是爲要

著昨經奏陳矣

寄北京榮中堂

五月初九日

張振榮陽電稱至寶店不能再進疏河匪聚涿州匪踞
等語大軍若北路由寶店進南路由高牌店進約期圍
擊可在疏涿捕獲大股雄部精隊何難指日盪平惟聶
提來電匪勢日眾防不勝防祇求 九重及樞府俯察
機宜迅賜酌奪以免燎原等語似須立定主見給予訓
條凡聚眾持械卽准格殺以免統將誤會袖手失機至
聚者散之化莠爲良全在地方官得人聞省城大吏不

和於事亦稍礙上年川匪卽是藩司了結可見得人爲
要著中堂公忠虛心用敢密抒所見

寄王中堂

五月初九日

路工洋人被難瑞士二人意國二人或云另有一法人
鐵路我若不認保護恐大有關係初九電奏頗不合上
意如何然遲恐山東各會合股各國生心師須與榮相
力持正論宣初十可回滬

榮中堂來電

五月初十日

匪事辦法今已明降 諭旨今日復派剛相赴保
定一帶宣布解散如不行卽一意勦辦也

楊村聶軍門來電 五月十一日

榮相奏派赴保勦辦迄今未奉 諭旨以黃村站
燬匪勢甚眾初九督隊來楊村扼紮初十聞郎坊
站又燬偕張京卿及唐道紹儀乘車前往火仍未
熄匪眾持械列道旁當卽退至落堡調隊籌備昨
今兩次匪眾猛撲皆經督隊擊敗頃奉榮相灰電
有派剛相開導之 旨自應欽遵辦理謹以奉聞

寄李中堂 五月十二日

奉文電併徵摺請抄行監工六人無下落二瑞士二意
人法比各一人涿州琉河百里內匪不退橋路盡壞京

津亦有兩處被拆聶軍紮楊村匪不難平但樞廷無欲
平意初十 明降各國指爲袒匪抑教實據語頗不平
兵船到沽三十隻內亂外衅恐非萊公還鎮北門不可

粵督李中堂來電

五月十三日

昨赫德來電若局面無速轉機各國必定并力大
局危亡卽在旦夕請電奏迫我以不得不電聞有
密諭裕勿進勦國事太亂政出多門鄙人何能
爲力近情仍續報

寄天津裕制台黃道台張道台保定廷藩台廷臬台孫

道台

五月十四日

倭松兄妹二人又意國二人法國一人比國一人在任
邱小龍王廟至天津沿河一帶散失請飛飭各州縣多
出賞格如有送活人到津者每名賞銀二千兩如有送
屍首到津者每名賞銀五百兩均由天津黃道台張道
台驗明付款

寄北京欽差大臣榮中堂路礦總局王中堂

五月十四日

駐津路透電外國云政府顯袒拳匪無疑惟有各國合
謀保護旅華西人身家產業并須速下辣手占管鐵路
爲要害又英使寄滬領事電云拳匪與西人爲難已有
證據政府僅派大員勸解始終未見勦匪 明諭等語

各西人皆電請本國添兵如中國不能自辦只得代中國執持兵政如埃及故事云謹聞

寄李中堂

五月十五日

昨又有洋兵一千五百名備足軍器入京剛趙宣撫恐陽奉陰違匪勢散漫難定此事師若回北洋似可速了

寄劉峴帥張香帥

五月十六日

十二函謹悉洋兵已進京二三千名聞俄兵將大至頃傳相接赫德電若局面無速轉機各國必定併力大局危亡卽在旦夕請電奏迫我以不得不電聞有密諭裕勿進勦國事太亂政出多門等語傳相督直二十五

年深得民心目前惟有調傅相回北內亂外衅或可漸弭公爲封疆重臣自應直抒忠悃冀救萬一若電奏京津線雖斷尙可由津局轉寄遲恐南北線皆斷矣

東撫袁慰帥來電

五月十八日

津京洋兵現已有八千上下聞仍有萬人續到大局不堪設想望隨時教我峴香兩帥有何善策

劉峴帥來電

五月十八日

機變甚速禍在眉睫敝處數切電北洋並電約湖廣會奏請速明諭痛勦未知諸公於意云何傅相選鎮一節似未便具奏

張香帥來電 五月十八日

京津路已經洋兵開通何不速將電線接通線雖
阻何不專馬馳寄每日彙送兩次何以津局遽不
收寄京電似非計望速酌辦再赴津商輪果停否
英斷無梗阻中外各國兵輪商輪之理若獨阻俄
必有戰事焦甚確音速示近日 兩宮聖駕已
還宮否京城毀教堂洋兵拒戰否剛趙宣諭匪肯
散否均望示復

寄江督劉峴帥鄂督張香帥 五月十八日

袁慰帥電津京洋兵現已有八千上下聞仍有萬人續

到大局不堪設想望隨時教我峴香兩帥有何善策云
各國正在籌議如兩公再不設策危殆卽在旦夕可勝
痛哭

寄江督劉峴帥鄂督張香帥皖撫王灼帥粵督李中堂
蘇撫鹿滋帥東撫袁慰帥 五月十八日

保定來電剛趙初十到涿拳民必要撤兵方退二公但
欲取結了事省北涿州一股省南獨流一股省東任邱
一股各聚數萬拳教連日開仗當軸視若無事云津電
慶慶出署端那啟溥進署日本隨員被董軍所殺董軍
死五六百人俄兵又到一千一百名英美兵專修鐵路

俄法亦聯絡云

張香帥來電 五月十九日

昨又與劉峴帥電商裕壽帥會奏力請主勦以救危局不知聽否總署換人董軍開衅大局不可思議恐非疆臣所能爲力矣奈何

劉峴帥來電 五月十九日

頃又會香帥電奏痛陳危急請 明諭速勦以謝各國而支危局若再不變計大事將去痛澈五內董軍何故殺日本隨員該軍死五六百人係在何處開仗所示

袁慰帥來電

五月十九日

衅端已成大局將裂殊深焦灼

寄江鄂兩帥

五月十九日

嘯電會奏 明諭痛勦不可再遲津城內教堂三處被
燬聚眾不散病在不肯殺人京津大道不通前日洋兵
放一排槍斃匪五十名而洋兵無一傷者何賴之有危
在眉睫尙不定計天平人乎

寄劉峴帥

五月十九日

洋報俄兵數千步行進京聞各國兵今晚搶大沽礮台
又聞有哀的美敦書廣濟已裝槍子赴津紛言接濟拳

匪請電壽帥設法接運自初十後洋人皆疑兵與匪合
明諭不下奈何

寄江甯劉峴帥蘇州鹿滋帥安慶王灼帥武昌張香帥
于次帥廣州李中堂長沙俞廩帥成都奎樂帥南昌松
鶴帥福州許筠帥

五月二十日

洋電京東城洋房拳匪焚燬殺華教民數百人各國兵
船泊四十餘號擬奪大沽礮台津城大火電線已斷暫
寄德州泊頭專送

張香帥來電

五月二十日

效電悉附寄榮相一電請速代遞電文如下

奏想已進呈從古無一國與各強國開衅之理況中國兵力最弱豈可激眾怒召速禍查拳匪乃亂民妖術無械無紀斷不能禦洋兵董軍僅五千勇而無謀必不能敵各國卽合各省兵力餉缺械少豈能抵禦羣強今拳匪與董軍無故亂殺是與各國一齊開衅危殆必矣且匪毀南北電線阻京津文報明是亂匪決非義民派各村供糧何異寇盜直隸災區民豈能堪至助清滅洋旗號乃會匪故智川楚鬧教匪徒皆是此旗萬不可信且落堡一戰洋兵一排槍匪死無數如何能戰在山東與官

兵拒捕臨陣並不能避礮確有明徵若恃邪匪以
衛中國恃董軍以敵各國萬無此理惟有請 旨
迅速勦匪嚴戢董軍不准生事方可阻洋兵不再
入京卽已進京者亦不過自保將來不過索賠款
責保護不至決裂匪烏合無糧無械官軍兩營可
敵匪數千一戰以後羣匪瓦解此外再無善策

宗社安危在此一舉若兵衅一開不可救矣各省
人心惶急皆深惡拳匪貽害國家京畿有變各省
將亂中堂文武重臣與國同休戚天下仰望惟望
公一言救危局存 宗社尤望請 旨嚴飭直隸

文武保護各路電線驛遞郵政已毀者速修以通

詔命奏報迫切叩禱

寄李中堂

五月二十日

號電可痛峴帥香帥昨又電商壽帥會奏力請主勦以
謝各國而支危局此次慶榮言亦不聽花農效電剛趙
撫局拳民已具結拆棚云京津焚燬洋房教堂不少京
津電請寄泊頭烟台轉遞

寄劉峴帥

五月二十日

黃道效電戌發線寅斷傳相得京咸電榮夜請見始回
變趙回云可解散董堅不任勦俟剛回定計漪瀾等並

黨國外衅可憂云明午派輪專弁赴京切實函榮王乞
公再致榮電午前寄下可帶往

劉峴帥來電 五月二十一日

運北槍子外人既疑濟匪難保到不被截留如計
算廣濟未過烟台可否電令折回一面由尊處將
細情函榮相交專弁送京祈酌辦電復

又 五月二十一日

嚴護教堂電線爲目前要務迭次文電交馳茲奉
號電又分電漕帥四藩三臬運司瀕鎮淮徐各道
會督文武加急保護矣再昨聞北洋以阻止洋兵

商各領事答以辦法三條內有護各使眷出都語
此卽下旗回國之證特慮意外未敢明言耳宜由
尊處函榮相設法勸阻若使眷回國則決裂更速
無可挽回矣

寄天津榮中堂

五月二十一日

亂勢燎原各國皆疑初十諭旨爲縱匪會議調兵兵
足而動要挾干預事變非常危機旣迫謹籌四端速降
明諭一所焚教堂所殺教士教民鐵路洋員洋匠剴
切惋惜二解散拳民恐累善良非有姑息今怙惡不悛
卽責成聶士成勦天津至豐台一路孫萬林勦良鄉至

保定一路限十日肅清駐守修復線路三 畿輔亢旱
責成府尹直督迅籌鉅款以振爲撫四李鴻章督直二
十五年久得民心威名素著卽調令督直限十日到津
於平內亂及勸阻洋兵進京必能做到四端同發內外
羣情必當一定天下仰望翹候施行

劉峴帥致榮中堂電

五月二十一日

匪事迭次電奏並電鈞處想達覽聞剛趙撫局已
具結並禁洋兵入都是袒匪拒洋已有明徵各國
兵隊大集危亡卽在旦夕無論中國勢弱至此卽
英俄等強國亦斷無開罪各國之理 祖宗創業

艱難無端毀壞謀國者不得辭其責務應切速陳
奏幡然變計危局或可撐持萬勿再惑邪說後悔
莫追

李中堂來電

五月二十二日

電召入覲 君父急難何敢遲延望速派妥船來
粵以便直放沽口勿遲誤聞公將北可同行

寄廣州李中堂江甯劉制台蘇州鹿中丞安慶王中丞
武昌張制台成都奎制台濟南袁中丞福州許制台長
沙俞中丞

五月二十二日

英領接烟電昨水師轟礮台兩座全奪日本獨奪礮台

一座日管帶受傷英一船受傷各國均齊心辦事俄日大隊軍馬將登沽岸云大沽既失一國與各國戰斷無此理局九船在津恐失餘卽換旗師宜坐公司船來滬須先照會各國水師提督方能北上

張香帥來電

五月二十二日

今午知傅相內召方喜事有轉機沽口一戰事無及矣然趁此速與各國議和總較入京後稍勝尊意有何緩兵議和之舉速示

劉峴帥來電

五月二十二日

沽台被奪京師已危至今日更無可言惟望傅相

速入或可解救何時由粵起程尊處得信否北電
來仍祈電示

袁慰帥來電

五月二十三日

頃有人十八九自京來稱十七八九三日夜匪在
京殺人放火十八攻交民巷被洋人擊死數十未
入巷外教堂均被焚洋大隊距城十數里樞派董
十營衛宮十營駐城外備敵剛已回京涿聚匪如
故河開以北遍地皆匪等語謹奉達

李中堂來電

五月二十三日

現定乘印度皇后船初一午開隨員小隊令搭廣

利同至吳淞再換廣利逕赴秦王島登岸開道進
京尊處得京津確信仍隨時電知粵至港線當飭
文武保護

寄劉峴帥 五月二十四日

福開森面稟各領事並無占吳淞之意英領事要我請
其保護是其偽術若爲所愚各國必不服白藻泰已將
此情電法等語自吳淞以迄長江內地公應飭滬道告
知各國領事自認保護勿任干預禱函到否

江督劉峴帥來電 五月二十四日

英允保淞確係詭計已電滬道密阻就目前惟有

穩住各國方可保全長江禍函辦法意見均同頃
又電滬道將力任保護意告各領

寄李中堂

五月二十四日

大沽互擊未奉 旨可不作爲失和洋兵大隊赴京董
軍城內外分紮尙恐誤打聞 旨傳拳民入衛 兩
宮有仍回淀園之說恐蹈庚申轍大局只望師到挽回
早一日好一日

李中堂來電

五月二十五日

京津事機日棘電詢宋祝三津榆路通否尙未接
復恐此路亦梗塞粵人呼籲攀留擬稍緩啟程以

待後命廣利船應飭在粵多留旬日望告方兒尊
處近日又得何消息隨時電告

又五月二十五日

彼謂沽台先開礮豈能由我混作董軍承 旨更
非誤打兒卽赴滬祈代借斜橋蔡宅暫住候信取
進止峴香已派兵北援否

劉峴帥來電 五月二十五日

拳匪入衛直錯到底慰廷電有西遷說果確全局
瓦解有聞祈電示

寄李中堂 五月二十五日

奉有電已電蔡借屋峴帥無派兵信只有張春發尙未
成軍頃由榆關保定濟南張家口專電慶榮密詢宗旨
但德添五千日添二千俄英亦添請電楊羅各使告外
部師卽入京應令水師提督勿阻拳匪易了大沽不算
失和勿聽謠言添兵使知師入有轉機少添兵爲妙駕
是否廣利來

寄東撫袁中丞

五月二十五日

徑電乃華洋開仗俄日添兵尤多京危恐西幸大局覆
合肥卽來滬擬待後命赴京但恐路梗塞請尊處專電
函詢榮相目前宗旨能否勦匪如何辦法候回信再定

進止

袁中丞來電 五月二十五日

頃有人二十一自京來述拳匪將前門外各街焚殆盡官民盡逃是日洋兵傷董兵數人兵匪協力擬攻交民巷來時尙未交綏云

又 五月二十五日

十日來三作書專送榮相均無復傳相北來辦法揣內亦無宗旨姑候相抵滬後請 旨進止

寄李中堂 五月二十五日

大沽各水師提督知會各處語意尙不難轉圜師北上

愚齋存藁 卷三十五
如何措辦啟行前應先請 旨近日電奏不能逕達惟
電慰廷處轉遞較捷如奉命下俾可早日籌策請鈞酌

愚齋存藁卷第三十五